

ಪೌಲನು ಕೊಲೊಸ್ಸೆದವರಿಗೆ ಬರೆದ ಪತ್ರಿಕೆ ಪೌಲಾನಿ ಕೊಲೊಸ್ಸೆತ್‌ಲ್ಯಾನಾ ಲಿವ್‌ಲ್ಯಾಲ ಪತ್ರ ವಳಕ್

ಕೊಲೊಸ್ಸೆನಾ ಲಿವ್‌ಲ್ಯಾಲ ಪತ್ರ ಅಪೊಸ್ತಲ್ ಜಾಲ್ಯಾಲಾ ಪೌಲ್ ಲಿವೊ1:1ತ್ಯನಿ ಹ್ಯ ಪತ್ರ ಕ್ರಿಸ್ತ ಜಲಾಮ್‌ಲ್ಯಾ ನಂತರ್ ಲ ಕರುನ್ 60 ವರ್ಸಾತ್ ಲಿವ್‌ಲ್ಯಾ ಹ್ಯಾ ಯಳಾತ್ ತ್ಯೊ ಲ ಕರುನ್ ರೊಮಾಚಾ ತುರುಂಗಾತ್ ಹುತ್ತಾ. ಕೊಲೊಸ್ಸೆತ್‌ಲ್ಯಾನಾ ಲಿವ್‌ಲ್ಯಾಲ ಪತ್ರ, ಎಪೆಸಾತ್‌ಲ್ಯಾನಾ ಲಿವ್‌ಲ್ಯಾಲ ಪತ್ರ ಆನಿ ಪಿಲೊಮೊನಾಲಾ ಲಿವ್‌ಲ್ಯಾಲ್ಯಾ ಪತ್‌ರ್‌ಲ್ಯಾನಾ ತುರುಂಗಾತ್ಲಿ ಪತ್ರಿ ಮನ್ವುನ್ ಹಾಕಟ್ಕಾತ ಕಾ ಮಂಜೆ ಹಿ ಪತ್ರಿ ಲಿವ್ತಾನಾ ತುರುಂಗಾತ್ ಹುತ್ತಾ. ಹ್ಯ ಪತ್ರ ತ್ಯನಿ ಕೊಲೊಸ್ಸೆ ಪೆರತ್ಲೆ ಸಬೆಲಾ ಲಿವೊ. 2:1ಸಾಂಗ್‌ಲ್ಯಾಸಾರ ಕೊಲೊಸ್ಸೆ ಸಬೆ ಪೌಲಾನಿ ಸುರ್ವಾತ್ ಕಿಲಿ ನಾಹಿ, ಫನ್ ತ್ಯಚೆ ಗುಶ್ಟಿತ್ ಥುಡಿ ಜವಾಬ್ದಾರಿ ತ್ಯನಿ ಗಿತ್ಲಿ ಎಪಪ್ರೊದ್ ಕೊಲೊಸ್ಸೆತ್ಲಾ ಜಾಲ್ಲ್ಯಾ ಮನ್ವುನ್ ತ್ಯನಿಸ್ ಹಿ ಸಬೆ ಬಾಂದಾಯಾ ಸಾದ್ಯ ಹಾ.

ಪೌಲಾನಿ ಸಭೆತ್ ಥೊಡ ಲಬಾಡ್ ಸಾಂಗ್ತಾ ಚಾಲತ್ಯಾ ಮನ್ವುನ್ ಕ್ಯಾಳ್ಜಿ ಗೆತಲ್ಯಾಲಾ ಜಾಲ್ಲ್ಯಾ ಹ್ಯಾ ಪತ್‌ರ್‌ಲ್ಯಾತ್ ಲ ತ್ಯ ಹೆ ಗುಶ್ಟಿತ್ ಲಿವ್‌ಲ್ಯಾ ತಿಥ ಜುನ್ಯಾ ಕರಾರಾತ್‌ಲ್ಯಾ ಯೆಹುದಿಂಚ್ ನ್ಯಾಮ್ ಇಸ್ವಾಸಿಂಚಾನಿ ಪಾಳಾಯಾ ವ್ಹಯಿ ಮನ್ವುನ್ ಖುಬ್ ಕರುನ್ ಮುಂಜಿ ಕರಾಯಾ ವ್ಹಯಿ ಮನ್ವುನ್ ಜುಲ್ಮಿ ಕರ್ತಾಲಾ ಯೆಹುದಿ ಇಸ್ವಾಸಿಂಚಾ ಯೊಕ್ ತಂಡಾ ಹುತ್ತಾ. ಪೌಲಾನಿ ಖಾತ್ರಿ ಕರುನ್ ಇಸ್ವಾಸಿನಾ ದೇವಾಪ್ಲಿ ಗಿಹ್ಯಾಲಾ ಕ್ರಿಸ್ತಾ ಸಿವಾರ್ ಕುನಾಚಿ ನಾಹಿತ ಕಶಾಚಿ ಗರಜ್ ನಾಹಿ ಆನಿ ತ್ಯ ಸಾಂಗ್ತಾ ಮನ್ವಾಂಚೆ ಉಪೇಗ್ ನಸ್‌ಲ್ಯಾಲ್ಯಾ ಕಾರನಾವ ಆಸ್ಲ ಮನ್ವುನ್ ಲಿವೊ 2:8 ಪಿರಿಕೆ

1. ಪೌಲ್ ಕೊಲೊಸ್ಸೆಚೆ ಸಭೆಲಾ ನಮಸ್ಕಾರ್ ಸಾಂಗಿತ್ ಪತ್ರ ಸುಪಿವೊ.1:1-2
2. ನಂತರ್ ತ್ಯೊ ಕ್ರಿಸ್ತಾಚಿ ಸೃಷ್ಟಿತೆಚಿ ಗುಶ್ಟಿತ್ ಖುಬ್ ಕರುನ್ ಕೊಲೊಸ್ಸೆತ್ ಆಸ್‌ಲ್ಯಾಲ್ಯಾ ಲಬಾಡ್ ಸಾಂಗ್‌ನ್ಯಾಲಾ ಪ್ರತಿ ಉತ್ತರ್ ದೆತ್ಯಾಲ್ಯಾಚೆ ಗುಶ್ಟಿತ್ ಲಿವೊ 1:3—3:4
3. ತ್ಯಾಚಾ ಖುಬ್ ಪತ್‌ರ್‌ಚೆಗತ್ ಪೌಲ್ ಆಪ್ಲ ಅರ್ಧ್ಯಾತ್ಲ ಅರ್ಧ ಪತ್ರ ಇಸ್ವಾಸಿ ಜೀವ್ಣಾ ಕರಾಯಾ ವ್ಹಯಿ ಜಾಲ್ಯಾಲ ಖಾತ್ರಿಚಾ ಸುಸ್ಣಾ ದೆತ್ಲೊ 3:5—4:6
4. ಪೌಲ್ ನಮಸ್ಕಾರ್ ಕರ್ತಾಲ್ಯಾಸ್ ಲಾಗುನ್ ಆನಿ ಪತ್ರ ದುಸ್ರೆ ಸಬೆತ್ ಜೊರಾನಿ ವಾಚ್ಪಾಯಾ ಸುಸ್ಣಾ ದಿಯಿತ್ ಪೌಲ್ ಪತ್ರ ಸುಪಿವೊ 4:7-18

¹ ದೇವಾಚಾ ಮನಾಚೆಗತ್ ಕ್ರಿಸ್ತ ಯೇಸುಚಾ ಅಪೊಸ್ತಲ್ ಜಾಲ್ಯಾಲಾ ಪೌಲ್ ಆನಿ ಬಾಹು ಜಾಲ್ಯಾಲಾ ತಿಮೊಥಿ,

² ಕೊಲೊಸ್ಸೆತ್ ಆಸ್‌ಲ್ಯಾಲ್ಯಾ ದೇವಾಚಾ ಲೊಕಾನಾ ಆನಿ ಕ್ರಿಸ್ತಾಪ ಇಸ್ವಾಸ್ ಆಸ್‌ಲ್ಯಾಲ್ಯಾ ಬನ್ದಿ ಬಾವ್ತಾನಾ ಲಿವಾಚ್ ಕ್ಯಾ ಮಂಜೆ, ಆಮ್ಚಾ ಬಾಪ್ಣಿ ತುಮಾನಾ ಕ್ರಪಾ ಆನಿ ಶಾಂತಿ ಗಾವುನಿ.

ದನ್ಯವಾದಾಚ್ ಮಾಗ್ಣ್

³ ತುಮ್ಮಿಸಾಟಿ ಆಮಿ ಮಾಗ್ಣ್ ಕರ್ತಾನಾ ತುಮ್ಮಿಸ್ ಲಾಗುನ್ ಆಮ್ಚಾ ಪ್ರಭು ಯೇಸು ಕ್ರಿಸ್ತಾಚಾ ಬಾ ದೇವಾಲಾ ದನ್ಯವಾದ್ ಕರ್ತಾವ್.

⁴ ಕಾ ಮಂಜೆ ತುಮಿ ಕ್ರಿಸ್ತ ಯೇಸುವ ಥೆವ್‌ಲ್ಯಾಲಾ ಇಸ್ವಾಸ್ ಆನಿ ದೇವಾಚಾ ಲೊಕಾಂಚಿವ ಥೆವ್‌ಲ್ಯಾಲೆ ಮಾಯಾಚೆ ಗುಶ್ಟಿತ್ ಆಮಿ ಐಕ್‌ಲ್ಯಾ

⁵ ಸ್ವರ್ಗಾತ್ ತುಮ್ಮಿಸಾಟಿ ರ್ಯಾಕ್‌ಲ್ಯಾಲೆ ಆಸೆಚೆ ಗುಶ್ಟಿತ್ ಬರೆ ಖಬ್ರಿಚಾ ಖರೈವಾಕ್ಯಾ ತುಮಿ ಆಂದಿಸ್ ಐಕ್‌ಲ್ಯಾಸಾ.

⁶ ತುಮಿ ಖರೈವಾತ್ ದೇವಾಚಿ ಕ್ರಪಾ ಐಕುನ್ ಸಮಜುನ್ ಗೆತಲ್ಯಾಲ್ಯಾ ದಿಸಾದರ್ನಿ ತುಮ್ಮಿಪ ಆಲ್ಯಾಲೆ ತೆ ಬರೆ ಖಬ್ರಿನಿ ತುಮಾನಾ ಫಳ್ ದಿಲ್ಯಾ ಶಾರ್ಕ ದುನೆತ್ ಸಗ್ಳಿಕ್ ಫಳ್ ದಿವುನ್ ಪಗಾಳತ್ಯಾ

7 ಹೀ ಬರಿ ಖಬರ್ ಕ್ರಿಸ್ತಾಚಾ ಇಸ್ವಾಸಾಚಾ ಸೇವಕ್ ಆಮ್ಚೆ ಮಾಯೆಚಾ ಜುಡಿಚಾ ಭಾಲ್ಯಾಲ್ಯಾ ಎಪಫ್ರಾಪ್ಲಿ ತುಮಿ ಸಿಕ್‌ಲ್ಯಾಸಾ.

8 ಪವಿತ್ರಾತ್ಮಾನಿ ದಿಲ್ಯಾಲೆ ತುಮ್ಚೆ ಮಾಯೆಚೆ ಗುಶ್ಟಿತ್ ಸಾಂಗ್‌ಲ್ಯಾಲ ತ್ಯನಿಸ್.

9 ಆಸ ಆಸ್ತಾನಾ ಹೆ ತುಮ್ಚೆ ಮಾಯೆಚೆ ಗುಶ್ಟಿತ್ ಆಮಿ ಐಕ್‌ಲ್ಯಾಲ್ಯಾ ದಿಸಾದರ್ನಿ ತುಮ್ಚಿಸಾಟಿ ಮಾಗ್ತಾಕರಾಚ್ ಥಾಂಬ್ವಾಚೆ ಆಂದಿ, ತುಮಿ ಸಗ್ಳೆ ಗಿನ್ಯಾನಾನಿ ಬುದ್ಧಿನ್ ಆತ್ಮಿಕ್ ಗಿನ್ಯಾನಾನಿ ಆನಿ ಸಮಜುಕಿನಿ ಬರ್ಹಾಯಾ ವ್ಹಯಿಸಾ ಮನ್ವನ್,

10 ಪ್ರಭುಲಾ ಆವ್ಡಸಾರ ತುಮಿ ಚಾಂಗ್ಲಾ ಜೀವ್ಣಾ ಕರಾಯಾ ವ್ಹಯಿಸಾ ಮನ್ವನ್, ಸಗ್ಳೆ ಚಾಂಗ್ಲಾ ಕಾಮಾತ್ಲಿ ಪ್ಯಾಯ್ಲಾ ದಿಯಿತ್ ದೇವಾಚಾ ಗಿನ್ಯಾನಾನಿ ಬರುನ್ ರಾಯ್ವ್ವಯಿ ಮನ್ವನ್,

11 ತ್ಯಚೆ ಮೈಮೆನಿ ಬರ್‌ಲ್ಯಾಚೆಗತ್ ಸಗ್ಳೆ ಬಳ್ ಗಿಹುನ್, ಸಗ್ಳೆ ಸಮಾಧಾನಾನಿ, ಖುಬ್ ಥಂಡ್ಪನಾನಿ ಸುಸ್ಪನ್ ಗಿಹ್ಯಾವ್ವಯಿಸಾ ಮನ್ವನ್,

12 ದೇವಾಚಾ ಬಕ್ತಾಂಚೆಸಾಟಿ ಉಜೀಡ್ ಗೆತ್ಯಾಲ್ಯಾ ಆಮಾನಾ ಚಾಂಗ್ಲೆ ಮನ್ವನ್ ಕೆಲ್ಯಾಲ್ಯಾ ಬಾ ಭಾಲ್ಯಾಲ್ಯಾ ದೇವಾಲಾ ಸಂತೊಶಾನಿ ಕ್ರತಜ್ಞತಾಸ್ತುತಿ ಕರಾಯಾವ್ವಯಿ ಮನ್ವನ್ ದೇವಾಪ ಮಾಕ್ಲೊ.

13 ದೇವಾನಿ ಆಮಾನಾ ಆಂದಾರಾಚಾ ತಾಬ್ಯಾತ್ಲಿ ಸುಡ್ವನ್ ಆಪ್‌ಲ್ಯಾ ಮಾಯೆಚಾ ಲೆಕಾಚಾ ರಾಜಾತ್ ಆನ್ಲ.

14 ತ್ಯಚಿಪ್ಲಿ ಆಮ್ಚಿ ಪಾಪ ಮಾಪ್ ಜಾಲಿತ ಆನಿ ಆಮಾನಾ ಸುಟ್ಕುಕ್ ಮಿಳಾಲಿ.

ಮಾನುಸ್ ಆನಿ ಕ್ರಿಸ್ತಾಚ್ ಕಾಮ್

15 ಕ್ರಿಸ್ತ ದಿಸತ್ ನಸ್‌ಲ್ಯಾಲ್ಯಾ ದೇವಾಚ್ ರುಪ್ ಭಾಲ್ಯಾ ಉತ್ಪತ್ತಿಲಾ ಸಗ್ಳೆ ಪೈಲಾ ಲೈಕ್ ಭಾಲ್ಯಾ.

16 ಸ್ವರ್ಗಾತ್ ದರ್ಶಿವ ಆಸ್‌ಲ್ಯಾಲ ದಿಸತ್ಯಾಲ ದಿಸತ್ ನಸ್‌ಲ್ಯಾಲ ಸಗ್ಳೆ, ಸಿಂಹಾಸನ್ ವ್ಹವುನಿ, ಪ್ರಭುತ್ವವ್ಹವುನಿ, ರಾಜ್‌ಬಾರ್‌ವ್ಹವುನಿ, ಹುಕುಮ್ ವ್ಹವುನಿ, ತ್ಯಚಿಪ್ಲಿ ಆಲ್ಯಾಲ. ಸಗ್ಳೆ ತ್ಯಚಿಪ್ಲಿನ್ ತ್ಯಚಿಸಾಟಿಸ್ ಕೆಲ್ಯಾಲ.

17 ತ್ರ್ಯೊಸಗ್ಳಾಂಚೆ ಆಂದಿ ಆಸ್‌ಲ್ಯಾಲಾ, ತ್ಯಚಿಪ ಸಗ್ಳಯೆಕ್ ವ್ಹಪುನ್ ಹಾ.

18 ಸಬೆ ಮಂಥ್ಯಾಲ್ಯಾ ಶರೀರಾಲಾ ತ್ರ್ಯೊ ಡುಯಿಜಾಲ್ಯಾ ತ್ರ್ಯೊಸ್ ಸುರ್ವಾತ್, ಸಗ್ಳಾತ್ ತ್ರ್ಯೊ ಪೈಲಾ ವ್ಹಯಾಸಾಟಿ ಮೆಲ್ಯಾಲ್ಯಾತ್ಲಿ ಪೈಲ್ಯಾನಿ ಉಟುನ್ ಆಲ್ಯಾಲಾ ತ್ರ್ಯೊಸ್.

19 ಕಾ ಮಂಜೆ ತ್ಯಚಿಪಸ್ ಸಗ್ಳ ರಾಹ್ಯಾವ್ಹಯಿ ಮನ್ಹುನ್,

20 ಆನಿ ತ್ರ್ಯೊಶಿಲ್ವೆಲ್ಯಾರಕ್ತಾನಿ ಆಪ್ನುಸಮಾಧಾನ್ ಕರುನ್, ದರ್ತಿವ ಸ್ವರ್ಗಾತ್ ಆಸ್‌ಲ್ಯಾಲ ಸಗ್ಳ ಆಪ್‌ಲ್ಯಾ ಲೆಕಾಸ್ ಲಾಗುನ್ ಆಪ್‌ಲ್ಯಾಲಾ ರಾಜಿ ಕರುನ್ಗಿಯಾವ್ಹಯಿ ಮನ್ಹುನ್ ಬಾ ದೇವಾನಿ ಮನ್ಶೆಲ.

21 ಯಕಾ ಯಳಾತ್ ಯವ್ಹಸ್ ನವ್ಹತುಮಿ ದೇವಾಪ್ನಿ ದುರ್ ಹುತ್ತಾಸಾ ತುಮ್ಮಾ ಬುರ್ಶಾಕಾಮಾನಿ ಡಾವಾನಿ ತ್ಯಲಾ ವಾದಿಜಾಲ್ಯಾಸಾ.

22 ಆತಾತರಿ ದೇವ್ ತುಮಾನಾ ಯೇಸು ಕ್ರಿಸ್ತಾಚಾ ಶರೀರಾಚಾ ಮರ್ನಾಸ್ ಲಾಗುನ್ ರಾಜಿ ಕೆಲೆ. ದೇವಾನಿ ಆಪ್ಲಿಪ ತುಮಾನಾ ನಿರ್ಮಳ್, ದೊಸ್ ನಸ್‌ಲ್ಯಾಲ, ಝಕ್ ನಸ್‌ಲ್ಯಾಲ ವ್ಹಪುನ್ ಉಬ ಕರಾಯಾಸಾಟಿ ಆಸ ಕೆಲ್ಯಾ.

23 ಆಬ್ಕಾಚೆ ಖಾಲ್ ಆಸ್‌ಲ್ಯಾಲ ಸಗ್ಳೆ ಉತ್ಪತಿಲಾ ಸಾಂಗ್‌ಲ್ಯಾಲ ಆನಿ ಐಕ್‌ಲ್ಯಾಲೆ ಬರೆ ಖಬ್ರಿನಿ ಗಾವಲ್ಯಾಲೆ ಆಶೆನಿ ಹಲಾಚೆ ಆಂದಿ ಇಸ್ವಾಸಾತ್ ರಾಯ್‌ಲ್ಯಾವ, ತುಮಿ ಪಾಯಾಜಾಲ್ಯಾಸಾ ಆನಿ ಘಟ್ ಆಸ್ವಾರಿ ವ್ಹಯಾ ವ್ಹಯಿಸಾ. ಹ್ಯಸ್ ಬರೆ ಖಬ್ರಿಲಾ ಪೌಲ್ ಮಂಥ್ಯಾಲಾ ಮಿ ಸೇವಕ್ ಜಾಲ್ಯೊ.

ಸಭೆಸಾಟಿ ಪೌಲಾಚ್ ಸೇವೆಚ್ ಕಾಮ್

24 ಆತಾ ಮಿ ತುಮ್ಮಿಸಾಟಿ ಖಾತ್ಯಾಲ್ಯಾ ತರಾಸಾತ್ ಮನಾ ಸಂತೊಸ್ ಹಾ. ಕ್ರಿಸ್ತಾಚಾ ದುಖಾತ್ ಕಮ್ಮಿ ಆಸ್‌ಲ್ಯಾಲ ತ್ಯಚೆ ಸಬೆ ಮಂಥ್ಯಾಲ್ಯಾ ಶರೀರಾಸಾಟಿ ಮಿ ಮಾಜಾ ಶರೀರಾತ್ ಅನ್ಭವಸುನ್ ಪುರ್ನ ಕರ್ತೊ.

25 ದೇವಾಚೆ ಯವಜ್ಞಾಸಾರ ತುಮ್ಮಾ ಪ್ಯಾಯ್ಡಾಸಾಟಿ ಮಿ ಸಬೆಲಾ ಸೇವಕ್ ಜಾಲೊ. ದೇವಾನಿ ಆಪ್ಲ ವಾಕ್ಯಾ ಸಗ್ಳೆ ಸಾಂಗಾಚ್ ಕಾಮ್ ಮನಾದಿಲ್ಲ.

26 ಹೃ ಆಡ್ಶಾ ಆಸ್ಲಾಲ್ಯಾ ಖರ್ರಾ ವಾಕ್ಯಾ ಪೈಲ್ಯಾ ಕಾಲಾದರ್ನಿ, ಪಿಡೀನ್ ಪಿಡಿ ದರ್ನಿ ಆಡಶಾ ಹುತ್ತ. ಫನ್ ಆತಾ ದೇವಾನಿ ತಿ ಆಪ್ಲಾ ಲೊಕಾನಾ ದ್ಯಾವ್ಲಾತ್.

27 ಹ್ಯಾ ಗುಟಾಚಿ ಮೈಮೆ ಕೃವ್ಣಿ ಮನ್ವುನ್ ಸಗ್ಳಾನಾ ಸಾಂಗಾಯಾ ದೇವಾಲಾ ಮನ್ ಜಾಲ್ಲ್ಯಾ ಹೃ ಗುಟ್ ಕ್ಯಾ ಮನ್ವುನ್ ಮೈಮೆಚೆ ಆಶೆಲಾ ಆಧಾರ್ ಜಾಲ್ಯಾಲಾ ಕ್ರಿಸ್ತ ತುಮ್ಮಿಪ ಹಾ.

28 ಆಮಿ ತ್ಯಚೆಸ್ ಗುಶ್ಟಿತ್ ಸಾಂಗ್ತಾವ್, ಸಗ್ಳಾನಾ ಶಾನ್ವುನ್ ಸಾಂಗಿತ್, ಸರ್ವಾನಾ ಪುರ್ರಾ ಗಿನ್ಯಾನಾನಿ ಸಿಕ್ಷಿತ್, ದೇವಾಚೆ ಮೊರ್ಹ್ ಸಗ್ಳಾನಾ ಕ್ರಿಸ್ತಾಪ ಸಗ್ಳಾತ್ ಮೊರ್ಲ್ಡ್ ಉಬ್ಬಿಕರಾಯಾ ಯತ್ನಕರ್ತಾವ್.

29 ಹ್ಯಚಿಸಾಟಿ ಮಾಜಿಪ ಕಾಮ್ ಕರ್ನಾರ್ರಾ ದೇವಾಚಾ ಬಳಾನಿ ಜರುನ್ ಲಡ್ಲೊ.

2

1 ಆನಿ ಲವೊದಿಕಿತ್‌ಲ್ಯಾನಾಬಿ ಆನಿ ಮನಾ ಸಮುರ್ ಬಗ್ಲಾ ನಸ್ಲಾಲ್ಯಾ ಸಗ್ಳಾನಾ, ಮನಾ ಖುಬ್ ಲಡಾಯಿ ಹಾ ಮನ್ವುನ್ ತುಮಾನಾ ತಾವ ರಾಹುನಿ. ಮನ್ವುನ್ ಮನ್ ಕರ್ತೊ.

2 ಕಸ ಮಂಜೆ ತ್ಯಂಚಿ ಮನ ಮಾಯೆತ್ ಗಿಹುನ್ ಆದಾರ್ ಗಿಹುನ್ ಪುರ ಖಾತ್ರಿಚಾ ಬಾಗ್ಯ ಗಿಹುನ್ ಬಾ ಜಾಲ್ಯಾಲ್ಯಾ ದೇವಾಚೆ ಆನಿ ಕ್ರಿಸ್ತಾಚೆ ಖರ ಸಮಜುನ್ ಗಿಹ್ಯಾಚೆಸ್.

3 ಹ್ಯಾ ಕ್ರಿಸ್ತಾಪಸ್ ಗಿನ್ಯಾನ್ ಆನಿ ಬುದ್ಧಿ ಸಗ್ಳಿ ದೌಲತ್ ದಡುನ್ ಹಾ.

4 ಕುನಿ ತುಮಾನಾ ಆಪ್ಲ ಮನ್ ಪರ್ತಾಚಾ ಬೊಲ್ಯಾಂಚಾನಿ ಪಸ್ಪು ನಾಹಿ ಮನ್ವುನ್ ಮಿ ತುಮಾನಾ ಹ್ಯಾ ಸಾಂಗ್ತೊ.

5 ಮಿ ಶರೀರಾನಿ ತುಮ್ಮಿಪ ನಸ್ಲೊತರಿ ಆತ್ಮಾನಿ ತುಮ್ಮಿ ಸಂಗ ರಾವ್ತುನ್ ತುಮಿ ಶಾರ್ಕ್ ಚಾಲತ್ಯಾಲ ಆನಿ ಕ್ರಿಸ್ತಾಚಾ ಇಸ್ವಾಸಾತ್ ಘಟ್ ಉಬರಾಯಲ್ಯಾಲ ಬಗುನ್ ಸಂತೊಸ್‌ವ್ತೊ.

ಕ್ರಿಸ್ತಾಪ ಸಗ್ಳಾ ಜೀವ್ತಾ

6 ತುಮಿ ಪ್ರಭು ಜಾಲ್ಯಾಲ್ಯಾ ಕ್ರಿಸ್ತ ಯೇಸುಲಾ ಗೆತಲ್ಯಾಚೆಗತ್ ತ್ಯಚಿಪ ಆಸ್ತಾರಿ ವ್ಹಪುನ್ ಜೀವ್ತಾಕರಾ.

7 ತ್ಯಚಿಪ ಖೊಲ್ ಮುಳ್ ಸುಡುನ್, ತ್ಯಚಿಪ ಬಾಂದುನ್ ಆನಿ ತುಮಾನಾ ಸಾಂಗ್ಲ್ಯಾಲ್ಯಾ ಶಿಕ್ಷನಾಸಾರ ಕ್ರಿಸ್ತಾಚಾ ಇಸ್ವಾಸಾತ್ ಘಟ್ ರಾವ್ತುನ್ ದೇವಾಲಾ ಖುಬ್ ದನ್ಯವಾದ್ ಕರ್ನಾರಿ ವ್ಹವಾ.

8 ಫಸಿವತ್ಯಾಲ್ಯಾ ಆನಿ ಪ್ಯಾಯ್ತಾನ್ ಸ್ಲ್ಯಾಲ್ಯಾ ಸಗ್ಳ್ಯಾ ಶಿಕಿವ್ನ್ಯಾನ್ ಕುನಿ ತುಮಾನಾ ತಾಬ್ಯಾತ್ ಗಿಹ್ಯಾಚೆ ಆಂದಿ ಹುಶಾರ್ ರಾವ್ತಾ ಹ್ಯ ಮಾನ್ವಾಚೆ ಸಂವಸ್ ಕ್ರತಿಲಾ ಆನಿ ಪರಂಪರಾ ಪೈಲ್ಯಾ ಶಿಕಿವ್ನ್ಯಾನ್ ಸಂಬಂಧ್ ಆಸ್ಲ್ಯಾಲಾ ಖರ ಕ್ರಿಸ್ತಾಲಾ ನವ್ವ.

9 ದೇವಾಚಿ ಸಗ್ಳಿ ಪುರ್ನಜಾಲ್ಯಾಲ್ಯಾ ಕ್ರಿಸ್ತಾಚಾ ಶರೀರಾತ್ ಜೀವ್ತಾಕರ್ತಾ,

10 ತ್ಯೊ ಸಗ್ಳ್ಯಾ ಹುಕ್ಮಾನಾ ಆನಿ ಅಧಿಕಾರ್ನಾ ಸಗ್ಳ್ಯಾನ್ ಡುಯಿ ಜಾಲ್ಯಾ ಮನ್ಶುನ್ ತ್ಯಚಿಪ ರಾಹುನ್ ತುಮಿ ಪುರ್ನತಾ ಗೆತಲ್ಯಾಲಿ ಜಾಲ್ಯಾಸಾ.

11 ದೇವಾನಿ ತ್ಯಚಿಪ ತುಮಾನಾ ಮಾನ್ವಾಚಾ ಹಾತಾನಿ ಕರಾಯಾ ವ್ಹಯಿತ್ವಸ್ಲ್ಯಾಲಿ ಮುಂಜಿ ಕೆಲೆ. ಕ್ರಿಸ್ತಾಚಿ ಮುಂಜಿ ಶರೀರಾಚಾ ಪಾಪಾಚಾ ಸಭಾವ್ ಕಾಡಾಚಾ.

12 ತುಮಿ ಬಾಪ್ತಿಸ್ಮಾತ್ ಕ್ರಿಸ್ತಾ ಸಂಗ ಪುರ್ಲ್ಯಾಲಿ ಜಾಲ್ಯಾಸಾ, ಆನಿ ತ್ಯಲಾ ಮೆಲ್ಯಾಲ್ಯಾತ್ಲಿ ಉಟ್ಲ್ಯಾಲೆ ದೇವಾಚೆ ತಾಕ್ತಿವ್ ಇಸ್ವಾಸ್ ಥೆವ್ಲ್ಯಾಲ್ಯಾಸ್ ಲಾಗುನ್ ತ್ಯಚೆ ಸಂಗ ತುಮಿ ಉಟುನ್ ಆಲ್ಯಾಸಾ.

13 ಗುನ್ವಾ ಕರ್ತಲ್ಯಾನ್ ಆನಿ ಮುಂಜಿ ನಸ್ಲ್ಯಾಲ್ಯಾ ಶರೀರಾಚಾ ಭಾವ್ನಾನಿ ಮೇಲ್ಯಾಲ್ಯಾ ತುಮಾನಾ ದೇವಾನಿ ಕ್ರಿಸ್ತಾ ಸಂಗ ಭಗಿವಲ್ಯಾತ್ ಆನಿ ಆಮ್ಚೆ ಗುನ್ವ ಸಗ್ಳೆ ಮಾಪ್ ಕೆಲ.

14 ಆಮ್ಚಿವ ಭುಕ್ ವಾವ್ಲ್ಯಾಲೆ ಆಜ್ಞೆಚೆಗತ್ ಆಸ್ಲ್ಯಾಲ ಪತ್ರ ಕಾಡುನ್ ತ್ಯ ಶಿಲ್ಪೆವ್ ಮಾರುನ್ ನಾಹಿ ಆಸ ಕೆಲ.

15 ತ್ಯನಿ ರಾಜ್‌ಬಾರ್ ಆನಿ ಹುಕುಮ್ ಹಾತ್ಯಾರಿ ನಾಹಿ ಆಸಿ ಕರುನ್, ಆಪ್ಲೆ ಶಿಲ್ಪೆಸ್ ಲಾಗುನ್ ತ್ಯನಾ ಜಿತ್ ದಿವುನ್ ಪ್ರದರ್ಶನ್ ಕೆಲ.

16 ಆಸ ಆಸ್ತಾನಾ, ಖಾನ್ಯಾ ಪಿನ್ಯಾಚೆ ಗುಶ್ಟಿತ್ ಪವಿತ್ರ ದಿಸಾತ್ ಸನ್ ಆವಾಸ್ ಆನಿ ಸಬ್ಬತ್ ಪಾಳಾಚೆ ಗುಶ್ಟಿತ್ ತುಮಾನಾ ಗುನ್ವದಾರ್ ಮನ್ವುನ್ ಕುನಾಲಾ ಮನಾಯಾ ವ್ಹಪುನಾಹಿ.

17 ಹೀ ಮೊರ್ಡ್ಡಯತ್ಯಾಲ್ಯಾ ಕಾಮಾಂಚ್ ಸಾವುಟ್ ಜಾಲ್ಯಾ ಹ್ಯಂಚ್ ಖರ ರುಪ್ ಕ್ರಿಸ್ತುಸ್.

18 ಕಪಟ್ ಪನಾಚೆ ಇಚೆವ ಮನ್ ಥಿವುನ್ ದೇವ್ಪತಾಚೆ ಆರಾಧನೆತ್ ಮನ್ ಜಾಲ್ಯಾಲ ಜಾಲ್ಲ್ಯಾ ದರ್ಶಾನ ಜಾಲ್ಯಾತ ಮನ್ವುನ್ ಬಡಾಯಿ ಕರುನ್, ಹ್ಯಾ ಲೊಕಾತ್ಲ್ಯಾ ಗಿನ್ಯಾನಾನಿ, ಕಾರನ್ ನಸ್ತಾನಾ ಫುಗುನ್ ಆಸ್ಲೊಲ್ಯಾನಾ ತುಮಾನಾ ಗಾವಲ್ಯಾಲ ಬಕ್ಷಿಸ್ ನಿಹು ದಿವುನಕೊಸಾ.

19 ಆಸ್ಲಾಕ್ರಿಸ್ತ್ ಮಂಥ್ಯಾಲೆ ಡುಯಿ ಸಂಗ ಸಂಬಂಧ್ ನಸ್ಲಾಚೆಗತ್ ಹಾ, ಡುಯಿನಿಸ್ ಶರೀರ್ ಸಗ್ಳೆ ಸಿರನಿ ಸಾಂದ್ಯಾನಿ ವ್ಹಯಿತ್ಯೆ ಬಳ್ ಗಿಹುನ್, ಯೆಕ್ ಕೆಲ್ಯಾಲ ಶರೀರ್ ಕರುನ್, ದೇವಾನಿ ದಿಲ್ಯಾಲ್ಯಾ ಬಳಾನಿ ವಾಡತ್ ಯೆತ.

ಜಗಾಚ್ ಮರಾಚ್ ಕ್ರಿಸ್ತಾಸಂಗಸ್

20 ಆಕಾಸ್ತಾತ್ ಹ್ಯಾ ಲೊಕಾತ್ಲ್ಯಾ ಪೈಲ್ಯಾ ಶಿಕ್ಷನಾಚೆ ವಾಟ್ನಿಸ್ ತುಮಿ ಕ್ರಿಸ್ತಾ ಸಂಗ ಮೆಲ್ಯಾಲಿ ಜಾಲ್ಯಾಸಾ ತ, ಆಜುನ್ ಹ್ಯಾ ಲೊಕಾತ್ಲ್ಯಾ ಆಜ್ಞಾ ತುಮಿ ಕಾ ಪ್ಯಾಳ್ತಾಸಾ?

21 ಹ್ಯೆ ದರುನಕೊ, ಹ್ಯೆಚಿ ಚವ್ ಬಗುನಕೊ, ತ್ಯೆಲಾ ಆಪ್ಣೆ ನಕೊ ಮಂಥ್ಯಾಲೆ ಆಜ್ಞಸಾರ ಘಾಲಾಚ್ ಕಾ?

22 ಹ್ಯಾ ಮಾನ್ಸಾಂಚಾ ಆಜ್ಞಾ ಆನಿ ಶಿಕಿವ್ಣ ಉಪೆಗಾನಿ ನಾಸ್ ವ್ಹತ್ಯಾಲ್ಯಾ ಜಿನೊಸಾ ಶಾರ್ಕ ಹಾ.

23 ಆಸ್ಲಿ ಸಿಕಿವ್ಣಿ ಮಾನ್ಸಾಚಾ ಯವಜನ್ಯಾನಿ ಆಚರನೆನಿ, ಕಪಟ್ಕಾ ಫನಾನಿ ಆನಿ ಶರೀರಾಚೆ ಸಿಕ್ಷಾನಿ ಗಿನ್ಯಾನಾಚ್ ಮನ್ವುನ್ ದಿಸತ್ಯಾತ್, ಫನ್ ಶರೀರಾಚಿ ಇಚ್ಛಾ ತಾಬ್ಯಾತ್ ಆಸ್ಥಾನಾ ಹ್ಯಂಚಾನಿ ಕಚಾ ಪ್ಯಾಯ್ಡಾ ವ್ಹಯಿತ್ಯಾಹಿ.

3

1 ತುಮಿ ಕ್ರಿಸ್ತಾ ಸಂಗ ಉಟಿವಲ್ಯಾಲ ಜಾಲಾ ಆಸ್ಲಾಸಾತ ಸ್ವರ್ಗಾತ್ಲ ಜಿನೊಸ್ ತ್ಯವ್ಡಸ್ ಸೊದಾ, ತಿಥ ಕ್ರಿಸ್ತ ದೇವಾಚೆ ಉಜ್ವಾಂಗ್ನಿ ಬಸ್‌ಲ್ಯಾ

2 ದರ್ಥಿವ ಆಸ್‌ಲ್ಯಾಲ್ಯಾಚೆ ಗುಶ್ಟಿತ್ ನವ್ವ ಸ್ವರ್ಗಾತ್ ಆಸ್‌ಲ್ಯಾಲ್ಯಾಚೆ ಗುಶ್ಟಿತ್ ತುಮಾಚ್ ಧ್ಯಾನ್ ಥೆವಾ.

3 ಕಾ ಮಂಜೆ ತುಮಿ ಮರುನ್ ಆನಿಕ್ ತುಮಚಾ ಜೀವ್ನಾ ಕ್ರಿಸ್ತಾ ಸಂಗ ದೇವಾಪ ಆಡಶಾ ಹಾ.

4 ತುಮಾನಾ ಜೀವ್ ಜಾಲ್ಯಾಲಾ ಕ್ರಿಸ್ತ್ ದಿಸ್ತಾನಾ ತುಮಿ ಸಾಯಿತ್ ತ್ಯಚಿ ಸಂಗ ಮೈಮೆತ್ ದಿಸ್ತಾರ್.

ಜುನ್ನಾ ನವಾ ಜೀವ್ನಾ

5 ಮನ್ವುನ್ ತುಮ್ಮಿಪ ಆಸ್‌ಲ್ಯಾಲ್ಯಾ ಹ್ಯಾಲೊಕಾತ್‌ಲ್ಯಾ ಆಶಾ ಮಂಜೆ, ವ್ಯಭಿಚಾರ್, ಪೊಡ್ಡ, ಕಾಮಾಭಿಲಾಶೆ, ಬುರ್ಸಿ ಆಶಾ ಆನಿ ಪಾಶಾನ ಪುಜಾಲಾ ಶಾರ್ಕ ಆಸ್‌ಲ್ಯಾಲಿ ಬುರ್ಸಿ ಆಶಾ ಆಸ್ಲ ಸಗ್ಳೆ ಮಾರುನ್ ಟಾಕಾ.

6 ಹ್ಯಂಚಿಸ್ ಲಾಗುನ್ ಸಾಂಗ್‌ಲ್ಯಾಲ ಐಕಿತ್ ನಸ್‌ಲ್ಯಾಂಚಿವ ದೇವಾಚಾ ರಾಗ್ ಯತೊ.

7 ಆಂದಿ ತುಮಿ ಸಾಯಿತ್ ತಸ್‌ಲ್ಯಾತ್ ಜೀವ್ನಾ ಕರೀತ್ ತ್ಯಚಾಲ್ವಿತಾಸಾ.

8 ಫನ್ ಆತಾತರಿ ಡಾವ್, ರಾಗ್, ಖೊಟಪನ್, ನಿಂದಾ ಆನಿ ಬುರ್ಸ ಬೊಲ್ವ್ ಸುಡುನ್ಡೆವಾ.

9 ಯಕಾಮಕಾಲಾ ಲಬಾಡ್ ಸಾಂಗುನಕೊಸಾ, ಕಾ ಮಂಜೆ ತುಮಿ ಪೈಲ ಸಭಾವ್ ತ್ಯಚಾ ಕಾಮಾಸಕಟ್ ಕಾಡುನ್ ಟ್ಯಾಕ್‌ಲ್ಯಾಸಾ

10 ಆನಿ ನವಾ ಸಭಾವ್ ಗೆತಲ್ಯಾಸಾ. ಹ್ಯೊ ಸಭಾವ್ ಉತ್ಪನ್ ಕೆಲ್ಯಾಲ್ಯಾಚಾ ಗಿನ್ಯಾನಾನಿ ತ್ಯೊ ನವಾ ವ್ಹಯಿತ್ ಯತೊ.

11 ಹ್ಯಾ ಗಿನ್ಯಾನಾತ್ ಗ್ರೀಕ್ ಆನಿ ಯೆಹುದ್ಯ ಮನ್ವುನ್ ಬೇದ್ ಭಾವ್ ನಾಹಿ, ಮುಂಜಿ ಕರುನ್ ಗೆತಲ್ಯಾಲಾ ಆನಿ ಮುಂಜಿ ಕರುನ್ ಗೆತಲ್ಯಾ ನಸ್‌ಲ್ಯಾಲಾ ಮನ್ಯಾಚಾ ಬೇದ್ವಾವ್ ನಾಹಿ, ವಳ್ಕಿಚಾ, ನವಳ್ಕಿಚಾ ಮನ್ಯಾಚಾ ಬೇದ್ವಾವ್ ನಾಹಿ, ಗುಲಾಮ್, ಸ್ವತಂತ್ರಿ ಮನ್ಯಾಚಾ ಬೇದ್ವಾವ್ ನಾಹಿ, ತ್ಯಚಿ ಬದ್ಲಿಸ್ ಕ್ರಿಸ್ತುಸ್ ಸಗ್ಳೆ ಆನಿ ಸರ್ವ್ವಾತ್ ರಾನ್ಹಾರಾ ಜಾಲ್ಯಾ

12 ಆಸ ಆಸ್ತಾನಾ ದೇವಾನಿ ನಿವಡ್‌ಲ್ಯಾಲಿ ವ್ಹವುನ್, ಪವಿತ್ರ ಆನಿ ಮಾಯೆಚಿ ಭಾಲ್ಯಾಸಾ ಮನ್ವುನ್ ಕರ್ನಾ, ದಯಾ, ಥಂಟ್ವುನ್, ಬಾರಿಕ್ ಫನ್, ಆನಿ ಖುಬ್ ಶಾಂತಿ ಮನ್ಯಾಚೆ ಚಾಂಗಲ್ಯಾ ಗುನಾಂಚಾನಿ ಬರವ್ಣುನ್ ರಾವ್ತಾ.

13 ಯಕಾಮಕಾಲಾ ಸುಸ್ವುನ್ ಕುನಾಲಾತರಿ ಆನಿ ಯಕಾವ ಫಿರ್ಯಾತ್ ದಿಯಾ ಕಾರನ್ ಆಸ್ಲತರಿ, ಫಿರ್ಯಾತ್ ದಿಯಾಚೆ ಆಂದಿ ಮಾಪ್ ಕರಾ, ಪ್ರಭುನಿ ತುಮಾನಾ ಮಾಪ್ ಕೆಲ್ಯಾತಸ ತುಮಿ ಮಾಪ್ ಕರಾ.

14 ಹ್ಯಸಗ್ಳು ಯಕ್ ಕರುನ್ ಪುರ್ನ್ ಕರ್ತ್ಯಾಲೆ ಮಾಯೆನಿ ತುಮಾನಾಸ್ ತುಮಿ ಬರವ್ಣುನ್ ಗೆವ್ತಾ.

15 ಕ್ರಿಸ್ತಾಚೆ ಥಂಟ್ವುನ್ ತುಮ್ಮಾ ಮನಾವ ಹುಕುಮ್ ಚಾಲ್ತುನಿ. ಹ್ಯನಿಸ್ ಥಂಟ್ವುನಾತ್ ಯಾಕ್ ಶರೀರ್ ವ್ಹವುನ್ ರಾಹ್ಯಾ ತುಮಾನಾ ಹಾಕಟ್‌ಲ್ಯಾ ಆನಿ ಯವ್ಡನ್ ನವ್ವ ಕ್ರತಜ್ಞತೆನಿ ರಾವ್ತಾ.

16 ಕ್ರಿಸ್ತಾಚಾ ವಾಕ್ಯಾ ತುಮಿಪ ಖುಬ್ ರಾಹುಂತಾ. ಸಗ್ಳ್ಯಾ ಗಿನ್ಯಾನಾನಿ ಯಕಾಮಕಾಲಾ ಸಿಕ್ವಿತ್ ಬುದ್ಧಿ ಸಾಂಗಾ. ಕೀರ್ತನಾನಿ, ಸ್ತುತಿಚಾ ಸಬ್ದಾಂಚಾನಿ ಆನಿ ಆತ್ಮಿಕ್ ಗಿತಾಂಚಾನಿ ಆನಿ ತುಮ್ಮಾ ಮನಾತ್ ದೇವಾಲಾ ಕ್ರತಜ್ಞತೆನಿ ಗಿತ್ ಮನ್ವಾ.

17 ತುಮಿ ಬುಲಿಚಾಲಿನಿ ವ್ಹವುನಿ ಕ್ಯಾ ಕೆಲಸಾತರಿ ತ್ಯ ಸಗ್ಳು ಪ್ರಭು ಯೇಸುಚಾ ನಾವಾನಿ ಕರಾ ಆನಿ ದೇವಾಲಾ ತ್ಯಚಿಸ್ ಲಾಗುನ್ ಕ್ರತಜ್ಞತಾಸ್ತುತಿ ಕರಾ.

ನವ್ಯಾ ಜೀವ್ನಾತ್ ಸ್ವತಾಚಾ ಸಂಬಂದ್

18 ಬ್ಯಾಯ್ಕಾನು, ತುಮಿ ಪ್ರಭುಪ ಹಾಸಾ ತಸಿ ತುಮ್ಮಾ ದನ್ಕಾರಾಂಚಾ ಸಾಂಗ್‌ನ್ಯಾತ್ ರಾವ್ತಾ.

19 ದನ್ಕಾರಾನು, ತುಮಿ ದನ್ಕರಿಚಿ ಮಾಯಾಕರಾ, ತ್ಯಚಿಸಂಗ ಜೊರಾನಿ ದಬ್ಯಾವು ನಕೊಸಾ.

20 ಮುಲಾನು, ಸಗ್ಳ್ಯಾ ಗುತ್ವಿತ್ವಿ ಆಯಿ ಬಾನಿ ಸಾಂಗ್‌ಲ್ಯಾಲ ಐಕಾ, ಕಾಮಂಜೆ ಹ್ಯ ಪ್ರಭುಲಾ ಆವಾಡಲ್ಯಾಲ ಹಾ.

21 ಬಾಸಾನು, ತುಮ್ಮಾ ಮುಲಾನಾ ಡಾಸ್ಕುನ್ ತ್ಯಂಚ್ ಮನ್ ದುಕ್ಕುನಕೊಸಾ.

22 ಭಾಕ್ರಾನು, ಹೇ ದುನೆತ್‌ಲ್ಯಾ ತುಮ್ಮಾ ದನ್ಯಾಂಚಾನಿ ಸಾಂಗ್‌ಲ್ಯಾಲ ಕರಾ, ಮಾನ್ಸಾನಾ ಆವ್ಡಶಾರ್ಕ ದನ್ವಿಬಗ್‌ತ್ಯಾಲಾ ಆಸ್ಥಾನಾ ತ್ಯವ್ಡಸ್ ಕಾಮ್ ಕರಾಚೆ ಆಂದಿ, ಪ್ರಭುಲಾ ಭಿಹುನ್ ಚಾಂಗಲ್ಯಾ ಮನಾನಿ ಕಾಮ್ ಕರಾ.

23 ತುಮಿ ಕಸ್ಲ ಕಾಮ್ ಕೆಲಾಸಾ ತರಿ ಮಾನ್ಸಾಟಿ ಮನ್ವುನ್ ಕರಾಚೆ ಆಂದಿ ಪ್ರಭುಸಾಟಿ ಮನ್ವುನ್ ಮನಾನಿ ಕರಾ.

24 ಪ್ರಭುಪ್ಪಿ ತುಮಾನಾ ಗಾವಾಚ್ ಪ್ರತಿಫಳ್ ತುಮಿ ಗೆನಾರ್ ಮನ್ವುನ್ ಸಮಜುನ್ ಪ್ರಭು ಕ್ರಿಸ್ತಾಚಿ ಸೇವಾ ಕರ್ನಾರಿ ವ್ಹವಾ.

25 ಅನ್ನೆವ್ ಕರ್ನಾರಾ ಆಪ್ಲು ಕೆಲ್ಯಾಲ್ಯಾ ಅನ್ನೆವಾ ಶಾರ್ಕಿ ಸಿಕ್ಷಾ ಗೆನಾರ್ ಆನಿ ತ್ಯಚಾ ಸಂಶೆವುಸ್ ನಾಹಿ.

4

1 ದನ್ಯಾನು, ಸ್ವರ್ಗಾತ್ ತುಮಾನಾಬಿ ಯೊಕ್ ದನ್ವಿ ಹಾ ಮನ್ವುನ್ ಸಮಜುನ್ ತುಮ್ಮಾ ಸೆವಕಾಂಚೆ ಸಂಗ ನೀಯೆತಿನಿ ನ್ಯಾಯಾನಿ ಚಾಲಾ.

ವಾಟ್ ದ್ಯಾವ್ಕಾರಾ

2 ಭುಕಾಚೆ ಆಂದಿ ಮಾಗ್ನ ಕರಿತ್, ಜಾಗ್ರುತಿನಿ ದೇವಾಲಾ ಕ್ರತಜ್ಞತಾಸ್ತುತಿ ಕರಾ.

3 ತ್ಯಾ ಯಳಾತ್ ಕ್ರಿಸ್ತಾಚಿ ಗುಟ್ ಮಂಜೆ ಬರಿ ಖಬರ್ ಆಮಿ ಸಾಂಗಾಯಾ ದೇವಾನಿ ಆಮ್ಚಿ ಸಾಟಿ ದಾರ ಉಗ್ಡಾಯಾ ಮಾಗ್ನ ಕರಾ. ಹೆ ಬರೆ ಖಬ್ರಿಸ್ ಲಾಗುನ್ ಮಿ ತುಂಗಾತ್ ಹಾ ನವ್ವ್

4 ಮಿ ತ್ಯಾ ಖರೈಚಾ ಅರ್ಥ್ ವ್ಹಯಿತಸ್ ಶಾರ್ಕಾ ಸಾಂಗ್ಚೊಗ ದಾವುನ್ ದಿಯಾ ವ್ಹವುನಿ.

5 ಯೊಳ್ ಶಾರ್ಕಾ ವಾಪುನ್ ಇಸ್ವಾಸಾತ್ ನಸ್‌ಲ್ಯಾಲಾಂಚೆ ಸಂಗ ಗಿನ್ಯಾನಾನಿ ವಾಗಾ.

6 ತುಮಾಚ್ ಬೊಲ್ವ ಕವಾಬಿ ಕ್ರಪೆನಿ, ಚವಿಚ್ ರಾಹುನಿ. ಆಸ ತುಮಿ ಪರ್ತೆಕಾಲಾ ಕ್ಯಾ ಕ್ಯಾ ಉತ್ತರ್ ದಿಯಾವ್ಹಯಿ ಮನ್ವುನ್ ಸಮಾಜ್ಕಾರ್.

ಸರ್ತ ಸಮಾರಮ್

7 ಮಾಯೆಚಾ ಬಾಹು, ಇಸ್ವಾಸಾಚಾ ಸೇವಕ್ ಮಾಜಾ ಗುಸ್ತಿ ಸಗ್ಳ್ಯಾ ತುಮಾನಾ ಸಾಂಗ್ತಾರ್.

8 ತುಮಿ ಆವ್ಚೆ ಗುಶ್ಟಿತ್ ಸಮಜುನ್ ಗಿಹಿಸಾರ, ತ್ಯೊ ತುಮ್ಮಾ ಮಾನಾನಾ ಉಮೇದ್ ದೆನಾರ್.

9 ತ್ಯೊ ಇಸ್ವಾಸಾಚಾ ಆನಿ ಮಾಯೆಚಾ ಬಾಹು ಜಾಲ್ಯಾಲಾ ತುಮ್ಮಾನ್ ಗಾವಾತಲ್ಯಾ ಓನೇಸಿಮಾ ಸಂಗ ಲಾವುನ್ ದಿಲ್ಯಾ ತೇ ಹಿತ್ತ ವ್ಹತ್ಯಾಲ್ಯಾ ಗುಶ್ಟಿ ಸಗ್ಳ್ಯಾ ತುಮಾನಾ ಸಾಂಗ್ತಾಲ.

10 ಮಾಜೆ ಸಂಗ ತುಂಗಾತ್ಲಾ ಅರಿಸ್ತಾರ್ಕ್ ಆನಿ ಬಾರ್ನಾಬಾಚಾ ಬಾವ್ಲಾಚಾ ಪಾವ್ಲಾ ಜಾಲ್ಯಾಲಾ ಮಾರ್ಕ್ ತುಮಾನಾ ನಮಸ್ಕಾರ್ ಸಾಂಗ್ತಾರ್. ತ್ಯೊ ತುಮ್ಮಿಪ ಆಲ್ಯಾವ ತ್ಯಲಾ ಮಿಳ್ವುನ್ ಗೆವ್ವಾ ತ್ಯಚೆ ಗುಶ್ಟಿತ್ ಹು ಮನ್‌ಲ್ಯಾಸಾ ನವ್ವ.

11 ಯುಸ್ತ ಮಂಥ್ಯಾಲಾ ಯೇಸು ಸಾಯಿತ್ ತುಮಾನಾ ನಮಸ್ಕಾರ್ ಸಾಂಗ್ತೊ. ಯೆಹುದಿ ಇಸ್ವಾಸಿ ಸಂಗ ಹೆ ತ್ಯವ್ಡಸ್ ದೇವಾಚಾ ರಾಜಾಸಾಟೆ ಮಾಜೆ ಸಂಗಚ್ ಸೇವಕ್ ಜಾಲ್ಯಾತ, ಹಚಿಷ್ಟಿಮನಾ ಸಮಾದಾನ್ ಗಾವ್ಲಾ.

12 ಕ್ರಿಸ್ತ ಯೇಸುಚಾ ಸೇವಕ್ ಜಾಲ್ಯಾಲಾ ತುಮ್ಮಾ ಗಾವಾತ್ಲಾ ವಿಪಘ್ರಾ ತುಮಾನಾ ನಮಸ್ಕಾರ್ ಸಾಂಗ್ತೊ ತುಮಿ ಶಾನ ವ್ಹವುನ್ ದೇವಾಚಾ ಮನಾತ್ ಪುರ್ರ್ಯಾ ಇಸ್ವಾಸಾನಿ ರಾಹ್ಯಾವ್ಹಯಿ ಮನ್ವುನ್ ತುಮ್ಮಿಸಾಟೆ ಕವಾಬಿ ಮಾಗ್ನ್ ಕರ್ತೊ.

13 ಹ್ಯೊ ತುಮ್ಮಿಸಾಟೆ, ಲವೊದಿಕಿಯ ಆನಿ ಹಿರಿಯಪೊಲಿಯಾತ್‌ಲ್ಯಾಂಚೆಸಾಟೆ ಖುಬ್ ಖಟ್‌ಪಟ್ ಕರ್ತೊ ಮನ್ವುನ್ ಮಿ ಸಾಕ್ಷಿ ಸಾಂಗ್ತೊ.

14 ಮಾಯೆಚಾ ವೈದ್ಯ ಜಾಲ್ಯಾಲಾ ಲುಕ್ ಆನಿ ದೇಮಾ ಹ್ಯಂಚಾನಿ ತುಮಾನಾ ಇಚಾರ್ಲ್ಯಾ.

15 ಲವೊದಿಕಿತ್ ಆಸ್‌ಲ್ಯಾಲ್ಯಾ ಬಾವ್ಲಾನಾ ಆನಿ ಬನ್ವಿನಾ ನುಂಫಳಿಲಾ ಆನಿ ತ್ಯಿಚಾ ಗರ್ದಾತ್ ಮಿಳುನ್ ಯತ್ಯಾಲೆ ಮಂಡಳಿಲಾ ಇಚಾರ್ಲ ಮನ್ವುನ್ ಸಾಂಗಾ.

16 ತುಮಿ ಹ್ಯ ಪತ್ರ ವಾಚಿವ್‌ಲ್ಯಾ ನಂತರ್ ಲವೊದಿಕಿಚೆ ಮಂಡಳಿತ್ ಹ್ಯವಾಚ್ವಾಯಾ ಲಾವಾ ಆನಿ ತ್ಯಾಸ್ ಯಳಾತ್ ಲವೊದಿಕಿತ್ಲಿ ಆಲ್ಯಾಲ ಪತ್ರ ತುಮಿಬಿ ವಾಚ್ತಾ.

17 ಅರ್ಖಿಪಾಲಾ, ತು ಪ್ರಭುಷ್ಣಿ ಗೆತಲ್ಯಾಲಿ ಸೇವಾ ಜಾಗ್ರುತಿನಿ ಚಾವ್ಲಾಯಾ ವ್ಹಯಿಸ್ ಮನ್ವನ್ ಸಾಂಗಾ.

18 ಹ್ಯ ಪೌಲ್ ಮಂಥ್ಯಾಲಾ ಮಿ ಮಾಜಾ ಹಾತಾನಿ ಲಿವ್‌ಲ್ಯಾಲಾ ನಮಸ್ಕಾರ್. ಮಿ ತುಂಗಾತ್ ಹಾ ಮನ್ವನ್ ಯಾದ್ಕರಾ. ಕ್ರಪಾ ತುಮ್ಮಿ ಸಂಗ ರಾಹಿನಿ.

ದೆವಾಚಿ ಖರಿ ಕಬರ್
The New Testament in the Gowli language of India,
Devanagari script. ದೆವಾಚಿ ಖರಿ ಕಬರ್ (Bible)

copyright © 2023 The Word for the World International and Gowly Marathi Translation Samti, Karnataka

Language: (Gowli)

Contributor: The Word for the World International

ದೆವಾಚಿ ಖರಿ ಕಬರ್
ನವಾ ಕರಾರ್, 2023

The New Testament in Gowli Marathi Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

c4461ecc-9ab5-5edc-b62d-034ac186b922